

АМОС

[1]

¹Текоагийн хоньчдын дунд байсан Амосын үгс. Эдгээрийг тэрээр Иудагийн хаан Уззиагийн өдрүүдэд болон Израилийн хаан, Иоашийн хүү Иеробоамын өдрүүдэд, газар хөдлөлтөөс хоёр жилийн өмнө Израилийн талаарх үзэгдлүүдэд үзжээ.

²Тэр "ЭЗЭН Сионоос архирч байна.

Тэр Иерусалимаас Өөрийн дуу хоолойг илэрхийлж байна.

Хоньчдын бэлчээрүүд нь гашуудаж,

Кармелын орой нь хатжээ" гэсэн.

³ЭЗЭН ингэж айлдаж байна.

"Дамаскийн гурав, дөрвөн алдаа зөрчлийн шийтгэлийг Би болиулахгүй.

Учир нь тэд хурц төмрөөр Гилеадыг цохьсон юм.

⁴Тэгэхээр Би Хазаелын гэр дээр гал илгээнэ.

Тэр гал нь Бен-хададын цайзуудыг түймэрдэх болно.

⁵Би бас Дамаскийн дааман хаалганы хаалтыг эвдэж,

Авены хөндийгөөс оршин суугчдыг Бе-еденээс очирт таягийг барьсан хүнийг таслах болно.

Тиймээс Арамын ард түмэн Кир уруу цөлөгдөх болно" гэж ЭЗЭН айлдаж байна.

⁶ЭЗЭН ингэж айлдаж байна.

"Газын гурав, дөрвөн алдаа зөрчлийн шийтгэлийг Би болиулахгүй.

Учир нь тэд бүхэл бүтэн хүн амыг Едомд тушаахаар хөөсөн.

⁷Тэгэхээр би Газын ханан дээр гал илгээнэ.

Тэр гал нь түүний цайзуудыг түймэрдэх болно.

⁸Би бас Ашдодоос оршин суугчдыг,

Ашкелоноос очирт таягийг барьсан хүнийг таслах болно.

Тэр ч байтугай Би Екроны дээр Өөрийн мутрыг дураар нь тавьж,

филистчүүдийн үлдэгсэд мөхөх болно" гэж Эзэн БУРХАН айлдаж байна.

⁹ЭЗЭН ийнхүү айлдаж байна.

"Тирийн гурав, дөрвөн алдаа зөрчлийн шийтгэлийг Би болиулахгүй.
Учир нь тэд ахан дүүсийн барилдлагын гэрээг саналгүй,
бүхэл бүтэн хүн амыг Едомд тушаасан.

¹⁰Тэгэхээр Би Тирийн ханан дээр гал илгээнэ.
Тэр гал нь түүний цайзуудыг түймэрдэх болно".

¹¹ЭЗЭН ингэж айлдаж байна.

"Едомын гурав, дөрвөн алдаа зөрчлийн шийтгэлийг Би болиулахгүй.
Учир нь тэр өөрийн өрөвдөх сэтгэлийг даран, ах дүүгээ илдтэйгээ
мөрдсөн.

Түүний уур нь бас үргэлжлүүлэн тастсан.

Тэр өөрийн хилэнг мөнхөд барьсан.

¹²Тэгэхээр Би Теман дээр гал илгээнэ.

Тэр гал нь Бозрагийн цайзуудыг түймэрдэх болно".

¹³ЭЗЭН ийнхүү айлдаж байна.

"Аммоны хөвгүүдийн гурав, дөрвөн алдаа зөрчлийн шийтгэлийг Би
болиулахгүй.

Учир нь тэд өөрсдийн хил хязгаараа өргөжүүлэхийн тулд

Гилеадын жирэмсэн эмэгтэйчүүдийг сийчсэн.

¹⁴Тэгэхээр Би Раббагийн ханан дээр гал тавина.

Тэр гал нь тулааны өдөр дайны уухайн дунд,

ширүүн бороотой өдөр шуурган дунд түүний цайзуудыг түймэрдэх
болно.

¹⁵Тэдний хаан цөлөгдөх болно.

Жононгууд нь түүнтэй хамт явна" гэж ЭЗЭН айлдаж байна.

[2]

¹ЭЗЭН ийнхүү айлдаж байна.

"Моабын гурав, дөрвөн алдаа зөрчлийн шийтгэлийг Би болиулахгүй.

Учир нь тэрээр Едомын хааны яснуудыг үнс болтол шатаасан.

²Тэгэхээр би Моабын дээр гал илгээнэ.

Тэр гал нь Кериотын цайзуудыг түймэрдэх болно.

Моаб нь бужигнаан дунд, дайны уухай болон бүрэн дуутай хамт мөхөх
болно.

³Би бас түүний дундаас шүүгчийг тастан,

түүнтэй хамт бүх жононгуудыг нь алах болно" гэж ЭЗЭН айлдаж байна.

⁴ЭЗЭН ийнхүү айлдаж байна.

"Иудагийн гурав, дөрвөн гэм зөрчлийн шийтгэлийг Би болиулахгүй.

Учир нь тэд ЭЗЭНий хуулиас татгалзаж, Түүний тогтоолуудыг сахиагүй.

Тэдний худал нь тэднийг төөрүүлэн дагуулжээ.

Тэдний эцгүүд нь түүнийг дагаж байсан юм.

⁵Тэгэхээр Би Иуда дээр гал илгээнэ.

Тэр гал нь Иерусалимын цайзуудыг түймэрдэх болно".

⁶ЭЗЭН ингэж айлдаж байна.

"Израилийн гурав, дөрвөн гэм зөрчлийн шийтгэлийг Би болиулахгүй.

Учир нь тэд зөв шударгыг мөнгөөр, гачигдсан нэгнийг хос шаахайгаар худалдсан.

⁷Үгээгүй нэгний толгой дээрх газрын тоосны араас тэмүүлдэг тэд мөн даруу нэгний замыг эргүүлдэг.

Миний ариун нэрийг бузарлахын тулд эр хүн ба эцэг нь нэг охиныг хэрэглэдэг.

⁸Тахилын ширээ бүрийн дэргэд тэд барьцаа болгож авсан хувцаснууд дээр хэвтэж,

өөрсдийн Бурханы гэрт тэд торгуулагсдын дарсыг уудаг.

⁹Гэсэн ч, тэдний өмнө аморичуудыг устгасан нь Би байсан.

Хэдийгээр түүний өндөр нь хуш модны өндөр шиг бөгөөд тэрээр царс мэт хүчтэй байсан ч гэсэн устгасан.

Түүгээр ч барахгүй Би түүний дээдэх жимсийг болон доодох үндсийг нь ч устгасан.

¹⁰Египетийн нутгаас та нарыг авчирсан нь Би байсан.

Та нарыг аморичуудын нутгийг эзэмшүүлэхийн тулд дөчин жил Би та нарыг цөлд удирдсан.

¹¹Дараа нь Би та нарын зарим хөвгүүдийг эш үзүүлэгчид байхаар, та нарын зарим залуусыг Назир хүмүүс байхаар өсгөсөн юм.

Израилийн хөвгүүд ээ, энэ нь тийм биш үү?" гэж ЭЗЭН тунхаглаж байна.

¹²"Гэвч та нар Назир хүмүүст дарс уулгаж,

эш үзүүлэгчид «Та нар эш үзүүлж болохгүй» гэж тушаасан.

¹³Харагтун, тэрэг нь юүжилсэн тариагаар дүүрэхдээ дарагддаг шиг Би та нарын доор дарагдаж байна.

¹⁴Хамгийн хурдан хүний хурд нь мөхөж,
эр чадалтай хүн ч хүчээ тэтгэж чадахгүй.
Хүчтэй хүн ч өөрийн амийг аварч чадахгүй болно.

¹⁵Нумыг атгах хүн ч байрандаа тогтохгүй,
хөл нь хурдан хүн ч зугтахгүй.
Морьтон ч өөрийн амийг аварч чадахгүй болно.

¹⁶Дайчдын дундаас хамгийн зоригтой нь хүртэл тэр өдөр нүцгэн зугтах
болно" гэж ЭЗЭН тунхаглаж байна.

[3]

¹Израилийн хөвгүүд болох та нарын эсрэг Египетийн нутгаас Түүний
авчирсан бүхэл бүтэн гэр бүлийн эсрэг айлдсан ЭЗЭНий энэ үгийг сонс.

²"Газар дэлхийн бүх гэр бүлүүдийн дундаас Би зөвхөн та нарыг
сонгосон.

Тиймээс та нарын бүх гэм буруугийн төлөө Би та нарыг шийтгэнэ".

³Хоёр хүн тохиролцоогүй байж хамт алхах уу?

⁴Арслан ямар ч олзгүй байж ой дотор архирах уу?

Залуу арслан ямар нэгэн юмыг бариагүй болбоос,
нүхэн дотроосоо архирах уу?

⁵Урхинд өгөөш байхгүй бол шувуу нь газарт буй урхинд унах уу?
Юу ч баригдаагүй атал, урхи нь газраас дээш өргөгдөх үү?

⁶Хот дотор бүрээг үлээвээс, хүмүүс чичрэхгүй гэж үү?

Хэрвээ хотод гай гамшиг тохиолдвол үүнийг ЭЗЭН хийсэн биш үү?

⁷Үнэхээр Эзэн БУРХАН зарц нар, эш үзүүлэгчиддээ Өөрийн нууцыг
илчлэхээс нааш Тэр юуг ч хийхгүй.

⁸Арслан нь архирчээ!

Хэн үл эмээх вэ?

Эзэн БУРХАН айлджээ!

Хэн эш үзүүлэхгүй байж чадах вэ?

⁹Ашдодын цайзууд ба Египет газар дахь цайзуудад зарлагтун. "Самарийн
уулс дээр цуглар. Түүний доторх агуу хөл үймээнийг түүний дунд буй
дарлалыг үз. ¹⁰Гэвч тэд зөв юмыг яаж хийхийг мэддэггүй" гэж ЭЗЭН
тунхаглаж байна. "Тэд өөрсдийн цайзууддаа хүчирхийлэл болон сүйрлийг
нөөцөлжээ".

¹¹Тэгэхээр Эзэн БУРХАН ийнхүү айлдаж байна.

"Дайсан, түүгээр ч барахгүй нутгийг бүсэлж байгаа нэгэн та нараас хүчийг чинь татан буулгаж, та нарын цайзууд тоногдох болно".

¹²ЭЗЭН ийнхүү айлдаж байна.

"Хоньчин нь арслангийн амнаас хоёр хөл болон чихний тасархайг булаан авдаг шиг

Самарид оршдог Израилийн хөвгүүдийг орны булантай, хэвтрийн дэвсгэртэй хамт булаан авч одох болно.

¹³Сонсож, Иаковын гэрийн эсрэг гэрчил" гэж Эзэн БУРХАН, түмэн цэргийн Бурхан тунхаглаж байна.

¹⁴"Учир нь Би Израилийн гэм зөрчлийг шийтгэх өдөрт бас Бетелийн тахилын ширээнүүдийг ч шийтгэнэ.

Тахилын ширээний эврүүд таслагдаж газарт унана.

¹⁵Би бас өвлийн байшинг зуны байшинтай хамт цохих болно.

Зааны ясан байшингууд бас сөнөж, агуу байшингуудыг эцэс болгоно" гэж ЭЗЭН тунхаглаж байна.

[4]

¹Самарийн уулан дээрх Башаны үнээнүүд ээ, энэ үгийг сонс.

Та нар ядуу хүмүүсийг дарлаж, гачигдсан хүмүүсийг няц дардаг.

Та нар өөрсдийн эзэддээ "Одоо авчир, бид ууя" гэж хэлдэг.

²Эзэн БУРХАН Өөрийн ариун байдлаар тангарагласан.

"Харагтун, тэд та нарыг дэгээгээр болон та нарын сүүлчийн хүмүүсийг загасны дэгээгээр авч явах өдөр та нар дээр ирж байна.

³Та нар хэрмийн цөмөрхийгөөр гарч,

нэг нэгээр чирэгдэн, Хармон уруу хаягдах болно" гэж ЭЗЭН тунхаглаж байна.

⁴"Бетел уруу нэвтрэн орж, гэм зөрчлөө үйлд.

Гилгалд гэм зөрчлөө олшруул!

Өглөө бүр өөрийнхөө тахилуудыг авчирж, гурван хоног болгонд аравны нэгийг өргө.

⁵Мөн исгэсэн юмаар талархлын өргөлийг өргө.

Сайн дурын өргөлүүдийг зарлан, тэднийг мэдүүл.

Учир нь Израилийн хөвгүүд та нар ийнхүү хийх дуртай" гэж Эзэн БУРХАН тунхаглаж байна.

6"Гэвч танай бүх хотуудад Би та нарт цэвэрхэн шүдийг өгсөн ба танай бүх газарт талхны гачигдлыг өгсөн юм.

Гэсэн ч та нар Над уруу буцаж ирээгүй" гэж ЭЗЭН тунхаглаж байна.

7"Түүгээр ч барахгүй ургац хураах хүртэл гурван сар үлдээд байхад Би та нараас бороог татсан.

Тэгээд Би нэг хот уруу бороог явуулж, нөгөө хот уруу бороог явуулаагүй.

Нэг хэсэгт нь бороо орж байхад, бороо ороогүй хэсэг нь хатсан.

8Тиймээс хоёр, гурван хот нь ус уухаар өөр хот уруу гэлдрэх болно.

Гэвч та нар ханахгүй.

Гэсэн ч та нар Над уруу буцаж ирээгүй" гэж ЭЗЭН тунхаглаж байна.

9"Би та нарыг гангийн салхи, хөгцөөр цохьсон.

Та нарын олон цэцэрлэг, усан үзмийн талбайнуудыг, инжрийн ба чидун моддыг төөлүүр хорхой цөлмөж байсан.

Гэсэн ч та нар Над уруу буцаж ирээгүй" гэж ЭЗЭН тунхаглаж байна.

10"Египетэд үйлдсэн шигээ Би та нарын дунд гамшиг илгээсэн.

Би танай залуусыг олзолсон морьдтай чинь хамт илдээр хядсан.

Танай хуарангийн өмхий самхайг Би та нарын хамрын нүх уруу чихсэн.

Гэсэн ч та нар Над уруу буцаж ирээгүй" гэж ЭЗЭН тунхаглаж байна.

11"Бурхан Содом, Гоморраг хөмөрсөн шиг Би та нарыг хөмөрч, та нар дөлнөөс шүүрэн авагдсан цуцал шиг байсан.

Гэсэн ч та нар Над уруу буцаж ирээгүй" гэж ЭЗЭН тунхаглаж байна.

12"Тэгэхээр Израиль аа, Би чамд ийнхүү хийнэ.

Би чамд үүнийг хийх учраас Израиль аа, өөрийн Бурхантайгаа уулзахад бэлтгэгтүн".

13Учир нь харагтун, уулсыг бий болгож, салхийг бүтээж,

Өөрийн бодлуудаа хүнд тунхагладаг,

үүрийн туяаг харанхуй болгож,

дэлхийн өндөр газруудад гишгэн явдаг Нэгэн болох Түүний нэр нь түмэн цэргийн ЭЗЭН Бурхан юм.

[5]

1 Израилийн гэр ээ, би та нарын төлөө гашуудлын дуу болгон өргөж буй энэ үгийг сонс.

2 Онгон Израиль нь унаад, дахин босохгүй.

Тэр өөрийн нутагтаа орхигдсон. Түүнийг өргөх хэн ч алга.

3 Учир нь Эзэн БУРХАН ингэж айлдаж байна.

"Израилийн гэрт мянган хүчтэнийг гаргаж байгаа хот нь зуун хүнтэй үлдэнэ.

Мөн зуун хүчтэнийг гаргаж байгаа хот нь арван хүнтэй л үлдэнэ".

⁴Учир нь ЭЗЭН Израилийн гэрт ийнхүү айлдаж байна.

"Та нар амьдрахын тулд Намайг хай".

⁵Харин Бетел уруу бүү ханд, Гилгал уруу бүү оч, Беершебаг бүү туулан яв.

Учир нь Гилгал заавал олзлогдон явж, Бетел сүйрэлд учрана".

⁶Та нар амьдрахын тулд ЭЗЭНийг хай.

Эс тэгвэл Иосефын гэр ээ, Тэр гал мэт гарч, түймэрдэх болно.

Бетелд түүнийг унтраах юу ч алга.

⁷Та нар бол шударга байдлыг агь болгож, шударга ёсыг доош газар уруу хөөдөг хүмүүс юм".

⁸Тэр Плеиадесыг, Орионыг бүтээж, гүн харанхуйг өглөөгүүр сольдог. Мөн өдрийг шөнө болгон харанхуйлуулж, далайн усыг дуудан газрын гадаргуу дээр асгадаг. Түүний нэр ЭЗЭН юм.

⁹Сүйрэл нь бэхлэлт дээр ирэхийн тулд хүчтэн дээр сүйрлийн хамт урагш цахилагч нь Тэр юм.

¹⁰Дааман хаалган дээр зэмлэдэг хүнийг тэд үзэн яддаг, шулуунаар ярьдаг хүнийг тэд зэвүүцдэг.

¹¹Тиймээс та нар ядуу хүнд татвар ноогдуулж, тэднээс тарианы алба гувчуур нэхсэн учраас та нар сайн зассан чулуун байшингууд барьсан ч гэсэн тэндээ амьдрахгүй.

Та нар тааламжит усан үзмийн төглүүдийг тарьсан ч гэсэн тэдний дарснаас нь уухгүй.

¹²Учир нь та нарын гэм зөрчил нь их, нүгэл чинь үлэмж гэдгийг Би мэднэ.

Та нар зөв шударга хүнийг зовоож, хахууль авч, дааман хаалган дээр ядуусыг шоовдорлодог.

¹³Тэгэхээр ийм үед хашир хүмүүс дуугаа хураадаг.

Учир нь энэ бол ёрын цаг.

¹⁴Та нар амьдрахын тулд мууг биш, харин сайныг хай.

Та нарын хэлсэн ёсоор түмэн цэргийн ЭЗЭН Бурхан ийнхүү та нартай хамт байх болтугай.

15 Мууг үзэн яд, сайныг хайрла.

Дааман хаалган дээр шударга ёсыг тогтоо.

Тэгвэл түмэн цэргийн ЭЗЭН Бурхан Иосефын үлдэгсдэд нигүүлсэнгүй хандаж магадгүй.

16 Тэгэхээр түмэн цэргийн ЭЗЭН Бурхан, Эзэн ийнхүү айлдаж байна.

"Талбай бүрд орилох дуу сонсогдож, гудамж бүрд «Аяа, аяа» гэж тэд хэлж байна.

Тэд бас тариачныг гашуудахаар дуудаж, мэргэжлийн гашуудагсдыг эмгэнэлд дуудна.

17 Усан үзмийн цэцэрлэг бүрд орилох дуу гарна.

Учир нь Би та нарын дундуур өнгөрөх болно" гэж ЭЗЭН айлдаж байна.

18 ЭЗЭНий өдрийг хүсэмжлэгч та нар гаслантай яа.

ЭЗЭНий өдөр нь та нарт ямар зорилгоор хэрэгтэй вэ?

Энэ нь гэрэл биш, харанхуй байх болно.

19 Энэ нь хүн арслангаас зугтаад баавгайтай учрах мэт,

эсвэл гэртээ хариад, гараараа хана түшээд могойд хатгуулахтай адил юм.

20 ЭЗЭНий өдөр нь гэрлийн оронд харанхуй байх биш үү?

Түүгээр ч барахгүй дотроо ямар ч гэгээгүй түнэр харанхуй байх биш үү?

21 "Би та нарын найр наадмуудаас татгалзаж, тэднийг үзэн ядаж байна.

Би та нарын ёслолын чуулгануудыг чинь таалахгүй байна.

22 Та нар Надад шатаалт тахилууд,

идээн өргөлүүдийг өргөсөн ч Би хүлээн авахгүй.

Түүгээр ч барахгүй та нарын тарган малын эвийн тахилууд уруу ч харахгүй.

23 Өөрсдийнхөө дуунуудын чимээг Надаас зайлуул.

Би та нарын ятгын эгшгийг ч сонсохгүй.

24 Харин шударга ёс нь ус мэт, зөв шударга нь мөнх урсах урсгал мэт хуйлран бууг.

25 Израилийн гэр ээ, та нар цөлд дөчин жилийн туршид Надад тахилууд ба идээн өргөлүүдийг өргөн барьсан уу? **26** Та нар бас өөрсөддөө зориулан

хийсэн танай хаан Сиккут, өөрсдийн Кийун хөргүүд, өөрсдийн бурхдын одыг авч явсан. ²⁷Тэгэхлээр Би та нарыг Дамаскийн чанадад цөллөгт явуулна" гэж ЭЗЭН айлдаж байна. Түүний нэр бол түмэн цэргийн Бурхан.

[6]

¹Сионд тайван байгчид, Самарийн ууланд аюулгүй гэж үздэг хүмүүс болон

Израилийн гэрт хүрч очих үндэстнүүдийн чухал онцгой хүмүүс ээ, та нар гаслантай яа.

²Калне уруу очиж хар.

Тэндээс агуу Хамат уруу оч, дараа нь филистчүүдийн Гат уруу оч.

Тэд эдгээр хаанчлалуудаас илүү сайн юм уу?

Эсвэл тэдний нутаг дэвсгэр нь та нарынхаас илүү том юм уу?

³Та нар гай гамшгийн өдрийг хойшлуулж, хүчирхийллийн суудлыг ойртуулж авчрах уу?

⁴Та нар бол зааны ясан орнуудад хажуулж, буйдан дээрээ сунан хэвтэгчид бөгөөд сүргээс хургуудыг, хашаан дундаас тугалуудыг идэгчид юм.

⁵Мөн ятгын эгшигт тааруулан үг зохиож, Давид шиг өөрсөддөө зориулан дуу бичигчид юм.

⁶Тэд өөрсдийгөө хамгийн сайн тосоор тосолж, тахилд хэрэглэдэг аяганаас дарс уудаг боловч Иосефын балгаснуудын төлөө харж гашууддаггүй.

⁷Тийм учраас тэд одоо цөлөгдөгсдийн түрүүнд цөллөгт явах болно. Тэрийн хэвтэгчдийн найр нь эргэн одох болно.

⁸Эзэн БУРХАН Өөрөөрөө тангараглаж байна.

Түмэн цэргийн ЭЗЭН Бурхан тунхаглаж байна.

"Би Иаковын ихэрхэлд дургүйцэж, түүний цайзуудыг жигшиж байна.

Тийм учраас хот болон түүнд агуулагдах бүхнийг Би тушаах болно".

⁹Хэрвээ тэр үед нэг гэрт арван хүн үлдсэн бол тэд үхэх болно. ¹⁰Хэн нэгний авга ах, эсвэл халамжлагч нь түүний ясыг гэрээс гаргахын тулд түүнийг өргөж, байшингийн хамгийн дотор талд буй хүнд хандан "Чамтай хамт өөр хэн нэгэн бий юу?" гэх болно. Нөгөөдөх нь "Хэн ч алга" гэхэд, тэр хариулахдаа "Чимээгүй бай. Учир нь ЭЗЭНий нэр дурьдагдах ёсгүй" гэх

болно. ¹¹Харагтун, том байшингууд хэсэг болтлоо, жижиг байшингууд хэлтэрхий болтол хэмхрэгтүн хэмээн ЭЗЭН тушаах гэж байна.

¹²Хадан дээр морьд давхидаг уу?

Эсвэл хэн нэгэн үхэр хөлөглөн тэднийг хагалах уу?

Гэсэн ч та нар шударга ёсыг хор болгож,
зөв шударгын үр жимсийг шарилж болгон сольсон.

¹³Ло-дебарт баясан байгаа та нар аа.

Та нар хэлэхдээ "Бид өөрсдийн хүчээрээ Карнаимыг өөрсөддөө зориулан авсан биш үү?"

¹⁴Учир нь харагтун, Израилийн гэр ээ.

Би та нарын эсрэг үндэстнийг босгох гэж байна" гэж түмэн цэргийн ЭЗЭН Бурхан тунхаглаж байна.

"Тэгээд тэд Хаматын хоолойноос Арабагийн горхи хүртэл та нарыг зовоох болно".

[7]

¹Эзэн БУРХАН надад ийнхүү үзүүлсэн. Харагтун, хаврын ургац соёолж эхлэхэд Тэр царцааны сүргийг бий болгож байсан. Харагтун, хаврын ургац нь хааны хадлангийн дараа байсан. ²Энэ нь газрын ногоог идэж дуусахад, тэр үед би хэллээ.

—Эзэн БУРХАН өршөөн соёрх! Иаков нь жижиг учраас яаж зогсож чадах вэ?. ³ЭЗЭН энэ тухай Өөрийн бодлоо өөрчилсөн.

—Энэ нь болохгүй гэж ЭЗЭН айлдсан.

⁴Эзэн БУРХАН надад ийнхүү юмыг үзүүлсэн. Харагтун, Эзэн БУРХАН тэдэнтэй галаар тэмцэхээр дуудаж байсан. Тэр гал нь агуу гүнийг шатааж, тариалангийн газрыг ч түймэрдэж эхэллээ. ⁵Тэгэхэд би

—Эзэн БУРХАН, зогсоож өгөөч. Иаков нь жижиг учраас тэр яаж зогсож чадах вэ? гэж хэллээ. ⁶ЭЗЭН энэ тухай Өөрийн бодлоо өөрчилсөн.

—Энэ нь бас болохгүй гэж Эзэн БУРХАН айлдлаа.

⁷Тэр надад ийнхүү үзүүлсэн. Харагтун, Эзэн босоо хананы дэргэд Өөрийн мутартаа тэгшлүүрийг барин зогсож байлаа. ⁸ЭЗЭН надад

—Амос аа, чи юу харж байна вэ? гэхэд би Тэгшлүүр гэв. Тэгэхэд Эзэн "Харагтун, Би Өөрийн ард түмэн Израилийн дунд тэгшлүүрийг тавих гэж байна.

Би тэднийг цаашид хэлтрүүлэхгүй.

⁹Исаакийн мөргөлийн өндөрлөгүүд эзгүйрч,

Израилийн ариун газрууд нь хоосон хэвтэх болно.

Дараа нь Би Иеробоамын гэрийн эсрэг илдтэйгээр босох болно".

¹⁰Тэгэхэд Бетелийн тахилч Амазиа нь Израилийн хаан Иеробоамд үг илгээн,

—Израилийн гэрийн дунд Амос таны эсрэг хуйвалдсан. Түүний бүх үгсийг энэ газар тээх чадваргүй юм. ¹¹Учир нь Амос ийнхүү хэлж байна. "Иеробоам илдээр үхнэ. Израиль гарцаагүй өөрийн нутгаасаа цөллөгт явах болно" гэсэн. ¹²Дараа нь Амазиа Амост

—Яв, үзмэрч ээ, Иудагийн нутаг уруу зугтаж, тэнд талх идэж, тэнд эш үзүүллэгээ үзүүл! ¹³Харин цаашид Бетелд бүү эш үзүүл. Учир нь энэ газар нь хааны ариун газар, дээдсийн өргөө гэж хэлсэн.

¹⁴Тэгэхэд Амос Амазиад хариулсан нь

—Би бол эш үзүүлэгч бус бөгөөд эш үзүүлэгчийн ч хөвгүүн бус. Учир нь би малчин бөгөөд инжрийн жимс хураагч хүн байсан. ¹⁵Гэвч ЭЗЭН намайг сүргийн араас аваад, "Миний ард түмэн Израиль уруу очоод эш үзүүл" гэж ЭЗЭН надад айлдсан. ¹⁶Одоо ЭЗЭНий үгийг сонс. "Чи Израилийн эсрэг бүү эш үзүүл, Исаакийн гэрийн эсрэг бүү урсга" гэж чи хэлж байна. ¹⁷Тийм учраас ЭЗЭН ийнхүү айлдаж байна. "Чиний эхнэр хотод янхан болж, чиний хөвгүүд, охид илдэнд унаж, чиний газрыг хэмжүүрээр хувааж, чи өөрөө бузар шороон дээр үхэх болно. Түүгээр ч барахгүй, Израиль нь гарцаагүй өөрийн нутгаасаа цөлөгдөн явах болно" гэв.

[8]

¹Эзэн БУРХАН надад ийнхүү үзүүлсэн. Харагтун, тэнд зуны жимстэй сагс байсан. ²Тэр

—Амос аа, чи юу харж байна вэ? гэхэд би

—Зуны жимстэй сагс гэсэн. Тэгэхэд ЭЗЭН надад

—Миний ард түмэн Израилийн эцэс ирсэн. Би хойшид тэднийг хэлтрүүлэхгүй. ³Тэр өдөр ордны дуунууд орилооноор солигдоно гэж Эзэн БУРХАН тунхаглаж байна. Олон нь үхдэл болж, бүх газарт тэрээр тэднийг чимээгүйгээр гаргаж хаяна гэлээ.

⁴Гачигдсан хүмүүсийг гишгэчдэг та нар, үүнийг сонсоцгоо. Та нар нутгийн даруу хүмүүсийг устгах гэж,

⁵"Шинэ сар хэзээ өнгөрөх вэ?

Тэгвэл бид үр тариагаа зарах юмсан.

Амралтын өдөр хэзээ өнгөрөх вэ?

Тэгвэл бид улаан буудайн худалдааг нээх юмсан.

Энэ нь ефаг жижигрүүлж шекелийг томруулахын тулд,
хуурамч жинлүүрээр мэхлэхийн тулд бөгөөд

⁶ ядуусыг мөнгөөр, гачигдсаныг хос шаахайгаар худалдан авч,
мөн бид улаан буудайн хаягдлыг зарахын тулд юм" гэдэг.

⁷ ЭЗЭН Иаковын бардамналаар тангарагласан.

"Үнэхээр, Би тэдний ямар ч үйлдлийг нь хэзээ ч мартаггүй.

⁸ Үүнээс болж газар хөдөлж, тэнд оршдог хүн бүр гашуудахгүй гэж үү?
Үнэхээр, энэ бүгд Нил шиг босож, шидэгдэн, Египетийн Нил шиг
буурах болно".

⁹ Эзэн БУРХАН тунхаглаж байна.

"Би үд дунд нарыг жаргааж, гэрэлтэй өдөр газрыг харанхуй болгохын
тулд энэ нь тэр өдөрт болно.

¹⁰ Тэгээд Би та нарын баяр наадмуудыг гаслан,
та нарын бүх дуунуудыг гашуудал болгон эргүүлнэ.

Би хүн бүрийн ууцанд таар өмсгөж,
толгой бүрийг халзан болгоно.

Би үүнийг ганц хүүгийнхээ хойноос гашуудах үе мэт болгох бөгөөд
үүний төгсгөл нь гашуун өдөр мэт байх болно.

¹¹ Харагтун, Би газар дээр өлсгөлөнг илгээх өдрүүд ирж байна" гэж Эзэн
БУРХАН тунхаглаж байна.

"Талхаар өлсөх, усаар цангах бус,
харин ЭЗЭНий үгийг сонсохын төлөө өлсгөлөн байх юм.

¹² Ард түмэн далайгаас далай уруу,
умардаас бүр дорно зүг хүртэл гэлдрэх болно.

Тэд ЭЗЭНий үгийг эрэн цааш, нааш явах боловч түүнийг олохгүй.

¹³ Тэр өдөр үзэсгэлэн гоо онгон охид болон залуус цангаснаас болж
ухаан алдах болно.

¹⁴ Самарийн буруугаар тангарагладаг хүмүүсийн хувьд,

«Дан аа, чиний бурхны амьд буйгаар тангараглая»,

мөн «Беершебагийн замын амьд буйгаар тангараглая» хэмээгчдийн
хувьд,

тэд унаж дахин босохгүй".

[9]

- ¹Тахилын ширээний хажууд зогсож буй Эзэнийг би харсан бөгөөд
Тэр "Босгуудыг нь ганхуулахын тулд багануудын толгойг нь цохь.
Тэдний бүгдийнх нь толгой дээр тэдгээрийг эвд.
Тэгээд би тэдний үлдэгдлийг илдээр алах болно.
Тэднээс нэг ч оргодол зайлахгүй, нэг ч дүрвэгч зугтахгүй.
- ²Тэд Үхэгсдийн орон уруу ухаад орсон ч
тэндээс Миний мутар тэднийг барина.
Тэд тэнгэр уруу гарсан ч тэндээс би тэднийг буулгана.
- ³Тэд Кармелын орой дээр нуугдсан ч
Би тэднийг хайн олж, тэндээс барина.
Мөн тэд Миний харцнаас өөрсдийгөө далайн ёроолд далдалсан ч
тэндээс Би могойд тушааж, тэр тэднийг хатгах болно.
- ⁴Мөн тэд өөрсдийн дайснуудын өмнө олзлогдон явсан ч
тэндээс Би илдэнд тушааж, тэр тэднийг хядах болно.
Сайны төлөө бус, харин муугийн төлөө Би Өөрийн мэлмийгээ тэдний
эсрэг чиглүүлнэ" гэж айлдав.
- ⁵Түмэн цэргийн Эзэн БУРХАН бол газарт хүрч хайлуулдаг Нэгэн.
Газарт оршигч бүхэн гашуудаж, тэд бүгд Нил шиг босож, Египетийн
Нил шиг буудаг.
- ⁶Тэнгэрт Өөрийн дээд өрөөгөө барьж,
Өөрийн бөмбөгөр дээврийг дэлхийн дээгүүр суурилуулсан.
Тэр далайн усыг дуудаж, газрын гадаргуу дээр асгадаг.
Түүний нэр нь ЭЗЭН.
- ⁷"Израилийн хөвгүүд ээ,
та нар Миний хувьд Етиопийн хөвгүүдтэй адил биш гэж үү?" гэж ЭЗЭН
тунхаглаж байна.
"Би Израилийг Египетийн нутгаас,
филистчүүдийг Кафтораас,
арамейчуудыг Кирээс авчраагүй юу?"
- ⁸Харагтун, Эзэн БУРХАНЫ мэлмий нь нүгэлт хаанчлал дээр байдаг.
Би түүнийг газрын гадаргуунаас устгах болно.
Гэсэн ч Би Иаковын гэрийг бүрмөсөн устгахгүй" гэж ЭЗЭН тунхаглаж
байна.
- ⁹"Учир нь харагтун, Би тушааж байна.

Буудайг шигшүүрээр шигшдэгийн адил,
 Би Израилийн гэрийг бүх үндэстний дунд сэгсрэх болно.
 Гэвч нэг ч хайрга газарт унахгүй.

¹⁰ Миний ар түмний доторх бүх нүгэлтнүүд,
 «Гай гамшиг биднийг нөмрөхгүй, бидэнд учрах ч үгүй» гэж хэлэгсэд
 бүгд илдээр үхэх болно.

¹¹ Тэр өдөр Давидын нурж унасан бүхээгийг Би босгож,
 түүний цөмөрхийнүүдийг шаван битүүлнэ.
 Мөн Би түүний балгаснуудыг босгож,
 түүнийг эртний өдрүүдийнх шиг нь дахин байгуулна.

¹² Ингэснээр тэд Едомын үлдэгсдийг болон Миний нэрээр дуудагдах бүх
 үндэстнүүдийг өмчлөх юм" хэмээн үүнийг үйлдэгч ЭЗЭН тунхаглаж
 байна.

¹³ ЭЗЭН тунхаглаж байна.

"Харагтун, газар хагалагч нь хураагч хүнд,
 усан үзмийн худалдаачин үр таригч хүнд ойртох үед уулс амтат дарсыг
 дуслуулж,
 бүх толгод алга болох өдрүүд ирж байна.

¹⁴ Би бас Миний ард түмэн болох Израилийн олзлогдогсдоос буцаан
 авчирж,
 тэд нуранги хотуудыг дахин босгон амьдрах болно.
 Тэд бас усан үзэм, үзмийн төгөл тарьж, өөрсдийн дарсыг уун,
 цэцэрлэгүүдийг байгуулж,
 өөрсдийн жимсийг идэх болно.

¹⁵ Би бас тэднийг өөрсдийнх нь газар дээр тарина.
 Миний тэдэнд өгсөн газраас тэд дахин үндсээрээ таслагдахгүй" гэж
 чиний Бурхан ЭЗЭН айлдаж байна.